

重修鳳翔縣志

第八冊


第八冊外紀

紀事

祥異

雜記

DS
793
S952
F383
1767
v.8



鳳翔縣志卷之八

知縣羅鰲重修

外紀

紀事
雜記

祥異
志跋

紀載天人維史不忒天著災祥人紀失得邑志雖微
別休表慝往蹟紛綸棗梨永勒至彼拾遺雖非典則
然鑒詭竒可資見識故老傳聞搜求是力無漏無譌
史書羽翼志外紀

紀事

夏

帝癸三歲畎夷侵岐

帝癸三年畎夷入於岐以叛

竹書紀年

六歲岐戎來賓

帝癸六年岐踵戎來賓

竹書紀年

商

王小乙二十六祀古公亶父自豳遷岐改國號曰周

古公亶父復修后稷公劉之業薰育攻之欲得地

與民民皆怒欲戰古公曰殺人父子而君之予不

忍爲乃與私屬遂去豳踰梁山止於岐下豳人扶

老攜弱盡復歸古公於岐下他旁國亦多歸之於

是古公乃營築城郭室屋而邑別居之

史記周本紀

古公去豳處岐周居三月成城郭一年成邑二年

成都而民五倍其初

吳越春秋按鳳翔在夏商時俱爲岐地

王武乙三祀王賜周岐地

武乙三年命周公匄父賜以岐邑

竹書紀年



成王五年大蒐於岐陽

成王有岐陽之蒐

左傳

莊王十一年秦滅小虢

秦武公十一年初縣杜鄭滅小虢

史記秦本紀按今鳳翔東南

四十里號王鎮即其地又寶雞號縣鎮有縣城故址

僖王五年秦徙居雍

秦德公元年初居雍城大鄭宮

史記秦本紀按大鄭宮及雍縣故

城俱在鳳翔

惠王五年冬晉乞糴於秦許之

六年冬秦乞糴於晉晉不許遂發兵伐秦

七年冬晉侯及秦伯戰於韓獲晉侯

晉興兵將攻秦繆公發兵使丕豹將自往擊之與
晉惠公夷吾合戰於韓地晉君棄其軍與秦爭利
還而馬驚繆公與麾下馳追之不能得晉君反爲
晉軍所圍晉擊繆公繆公傷於是岐下食善馬者
三百人馳冒晉軍晉軍解圍遂脫繆公而反生得
晉君初繆公亡善馬岐下野人共得而食之者三
百餘人吏逐得欲法之繆公曰君子不以畜產害
人吾聞食善馬肉不飲酒傷人乃皆賜酒而赦之
三百人者聞秦擊晉皆求從從而見繆公窘亦皆

推鋒爭死以報食馬之德

史記秦本紀 按野人塢在今鳳翔

王命秦伯釋晉侯

繆公虜晉君以歸令於國齋宿吾將以晉君祠上帝周天子聞之曰晉我同姓爲請晉君夷吾姊亦爲繆公夫人夫人聞之乃衰絰跣曰妾兄弟不能相救以辱君命繆公曰我得晉君以爲功今天子爲請夫人是憂乃與晉君盟許歸之

史記秦本紀

二十九年秋王賜秦金鼓命爲西伯

秦用由余謀伐戎王益國十二開地千里遂霸西

戎天子使召公過賀賜繆公以金鼓史記秦本紀

王賜秦伯金鼓命爲西方諸侯伯綱目前編



文帝十五年夏四月始郊見五帝於雍

夏四月上幸雍始郊見五帝漢書文帝本紀

十三年議增雍五時路車各一乘駕被具西時睦

時禺車各一乘禺馬四匹駕被具後三歲徐廣曰在文帝

十五年夏四月文帝始郊見雍五時祠史記封禪書

後二年夏帝如雍

文帝後二年夏行幸雍棧陽宮

漢書文帝本紀
棧陽宮按三輔黃

圖在

扶風

四年夏五月帝如雍

後四年夏五月行幸雍

漢書文帝本紀

五年春三月帝如雍

後五年春三月行幸雍

漢書文帝本紀

景帝六年春二月帝如雍祠五帝

春二月巳酉行幸雍郊見五帝

漢書景帝本紀

武帝元光二年冬十月帝如雍祠五時

二年冬十月行幸雍祠五時

漢書武帝本紀

六年夏六月帝如雍

元光六年夏六月行幸雍

漢書武帝本紀

元狩元年冬十月帝如雍祠五時

武帝郊雍獲一角獸若麋然有司曰陛下肅祇郊

祀上帝報享賜一角獸蓋麟云於是以薦五時時

加一牛以燎賜諸侯白金以風符應合於天

漢書郊祀

志

武帝幸雍祠五時獲白麟一角五足作歌歌之終

軍對曰野獸并角同本也殆將有解辮髮左衽冠帶而化者由是改年曰元狩後越地及匈奴名王

率衆來降

白孔六帖

二年冬十月帝如雍祠五時

元狩二年冬十月行幸雍祠五時

漢書武帝本紀

元鼎四年冬十月帝如雍祠五時

十月行幸雍祠五時自夏陽東幸汾陰

漢書武帝本紀

五年冬十月帝如雍祠五時遂巡邊

上祠五時於雍遂踰隴西出蕭關從數萬騎獵新

秦中以勒邊兵而歸新秦中或千里無亭徼於是

誅北地太守以下

綱目

元封二年冬十月帝如雍祠五時

冬郊雍五帝還拜祝祠太一

史記封禪書

四年冬十月帝如雍祠五時

元封四年冬行幸雍祠五時

漢書武帝本紀

太始四年冬十二月帝如雍祠五時

十二月行幸雍祠五時

漢書武帝本紀

征和三年春正月帝如雍

正月行幸雍

漢書武帝本紀

宣帝五鳳二年春三月帝如雍祠五時

太二年春三月行幸雍祠五時

漢書宣帝本紀

元帝初元五年春三月帝如雍祠五時

三月行幸雍祠五時

漢書元帝本紀

永光四年春三月帝如雍祠五時

三月行幸雍祠五時

漢書元帝本紀

建昭元年春三月帝如雍祠五時

三月上幸雍祠五時

漢書元帝本紀

成帝建始二年春正月罷雍五畤始親祠南郊

正月罷雍五畤辛巳上始郊祀長安南郊

漢書成帝本紀

元延元年春三月帝如雍祠五畤

三月行幸雍祠五畤

漢書成帝本紀

三年春正月帝如雍祠五畤

正月行幸雍祠

漢書成帝本紀

綏和元年春三月帝如雍祠五畤

三月行幸雍祠五畤

漢書成帝本紀

後漢

安帝元初元年春羌寇雍城

滇零死于零昌代立以杜季貢爲將軍元初元年

春零昌遣兵寇雍城

後漢書西羌傳○按雍城屬右扶風



惠帝太安二年秋七月顒舉兵反冬十一月詔雍州

刺史劉沉討之

劉沉字道真李流亂蜀詔沉以侍中假節討流行
次長安河間王顒請留沉爲軍司後領雍州刺史
及張昌作亂詔顒遣沉將州兵萬人征西府五千

人自藍田關討之顓不奉詔沉自領州兵至藍田
顓又逼奪其衆長沙王又命沉將武吏四百人還
州張方既逼京都王師屢敗王湖祖述言於父曰
劉沉忠義果毅雍州兵力足制河間宜啓上詔沉
發兵襲顓顓窘急必詔張方以自救此計之良也
父從之沉奉詔馳檄四境合七郡之兵及守防諸
軍塢壁甲士萬餘人以安定太守衛博新平太守
張光安定功曹皇甫澹爲先登襲長安

晉書劉
沉傳

永興元年春正月雍州刺史劉沉及顓戰敗死之

顓時頓於鄭縣之高平亭爲東軍聲援聞沉兵起
還鎮渭城遣都護虞夔率步騎萬餘人逆沉於好
時接戰夔衆敗顓大懼退入長安果急呼張方沉
渡渭而壘顓每遣兵出鬪輒不利沉乘勝攻之使
澹博以精甲五千從長安門而入力戰至顓帳下
沉兵來遲顓軍見澹等無繼氣益倍馮翊太守張
輔率衆救顓橫擊之大戰於府門博父子皆死澹
又被擒顓奇澹勇壯將活之澹不爲之屈於是見
殺沉軍遂敗與麾下百餘人南遁爲陳倉令所執

沉謂顓曰知已之顧輕在三之節重不可違君父之詔量強弱以苟全投袂之日期之必死菹醢之戮甘之如薺顓怒鞭之而後腰斬

晉書劉沉傳

劉沉被密詔討河間王顓光起兵助沉謀多不用及二州軍潰爲顓所擒顓謂光曰前起兵欲作何策光曰劉雍州不用鄙計故令大王得有今日也顓壯之表爲右衛司馬

張光傳

懷帝永嘉五年

漢主聰嘉平元年

冬十月馮翊太守索綝雍

州刺史賈疋等擊破劉曜於長安

索綝爲南陽王模從事中郎劉聰侵掠關東以綝
爲奮威將軍以禦之斬聰將呂逸又破聰黨劉豐
遷新平太守聰將蘓鐵劉五斗等掠劫三輔除綝
安西將軍馮翊太守綝有威惠華夷向服賊不敢
犯及懷帝蒙塵長安又陷模被害綝泣曰與其俱
死寧爲伍子胥乃赴安定與雍州刺史賈疋扶風
太守梁綜安夷護軍麴允等糾合義衆頻破賊黨
修復舊館遷定宗廟進救新平綝手擒賊帥李充
與閭鼎立秦王爲皇太子

晉書索
靖傳附

劉曜旣據長安安定太守賈疋及諸氏羌皆送質
任唯雍州刺史麴特新平太守竺恢固守不降護
軍麴允平陽令梁肅自京兆南山將奔安定遇疋
任子於陰密擁還臨涇推疋爲平西將軍率衆五
萬攻曜於長安扶風太守梁綜及麴特竺恢等亦
率衆十萬會之曜遣劉雅趙染來拒敗績而還曜
又盡長安銳卒與諸軍戰於黃邱曜衆大敗退保
甘泉杜人王禿紀特等攻劉粲於新豐粲還平陽
曜攻陷池陽掠萬餘人歸於長安

前趙
載記

十二月秦王業入於雍城

閻鼎天水人初爲豫州刺史屯許昌遭母喪乃於
密縣鳩聚西州流人數千欲還鄉里值京師失守
秦王出奔密中司空荀藩藩弟司隸校尉組及左
長史劉疇太傅叅軍騶捷僉以鼎有才用且手握
強兵假鼎冠軍將軍豫州刺史鼎少有大志因西
王人思歸欲立功鄉里乃與撫軍長史王毗司馬
傅遜懷翼戴秦王之計謂疇捷等曰山東非霸王
處不如關中河陽令傅暢遣鼎書勸奉秦王過洛

陽謁拜山陵徑據長安綏合夷晉興起義衆尅復
宗廟雪社稷之恥鼎得書便欲詣洛流人謂北道
近河懼有抄截欲南自武關向長安疇等皆山東
人不願西入並逃散鼎遂奉秦王行止上洛爲山
賊所襲殺百餘人率餘衆西至藍田時劉聰向長
安爲雍州刺史賈疇所逐走還平陽疇遣人奉迎
秦王遂至長安

晉書閻鼎傳

鼎與衆至藍田遣人告疇疇遣兵迎之入於雍城

使梁綜以兵衛之

綱目○按雍城故城在今鳳翔府西南

六年

漢嘉平二年

夏雍州刺史賈疋等進圍長安劉曜敗

走秦王業入長安

六年辛巳雍州刺史賈疋敗劉粲長安

王通元經

賈疋太尉詡之孫也累遷雍州刺史率兵三萬復

長安劉粲聞之使劉曜來戰疋破之曜中流矢追

至甘泉

薛收元經傳

冬十二月盜殺賈疋麴允領雍州刺史

疋與胡彭蕩仲結爲兄弟旋自渭橋襲蕩仲殺之

後蕩仲子夫護帥羣胡攻之疋敗走夜墮於澗爲

夫護所害

晉書賈正傳

閭鼎等立秦王爲皇太子於長安鼎總攝百揆允時爲安夷護軍始平太守心害鼎功且覘權勢因鼎殺京兆太守梁綜乃與綜弟馮翊太守緯等攻鼎走之會雍州刺史賈疋爲屠各所殺允代其任

翊允傳

孝武帝太元十二年

秦太初二年後秦建初二年

夏五月秦陷後

秦汧雍二城

登以竇衝爲車騎將軍纂攻姚碩德於涇陽敗之

姚萇自陰密救之纂退屯敷陸竇衝攻萇汧雍二城克之斬其將姚元平張畧等又與萇戰於汧東

爲萇所敗

十六國春秋○敷陸在今鄜州

安帝義熙十二年

秦主姚泓永和元年

春三月夏克秦雍城秦

主泓擊却之

勃勃進兵侵雍嶺北雜戶悉奔五將山征北姚恢率戶五千奔新平鎮西姚謐委鎮東走勃勃遂據雍抄掠郿城姚紹及征虜尹昭鎮軍姚洽等率步騎五萬討勃勃姚恢以精騎一萬繼之軍次橫水

勃勃退保安定

晉書後秦載記

魏

孝明帝正光五年六月南秦州反遣雍州刺史元志

討之

秦州城人莫折太提反詔雍州刺史元志討之

魏書

孝明帝紀

孝昌三年春正月汧城及豳岐諸州陷於賊

蕭寶夤元恒芝大敗於涇州大隴都督南平王仲

冏小隴都督高聿並相尋退散東秦州刺史潘義

卷之八 紀事

淵以沂城降賊高平虜賊逼岐州城人執刺史魏

蘭根以城應之

魏書孝明帝紀

〔孝莊帝〕永安三年春三月醜奴寇岐州都督賀拔岳

大破之

賊帥万俟醜奴蕭寶夤擁衆幽涇凶勢日盛榮遣

其從子天光爲雍州刺史率都督賀拔岳侯莫陳

悅等總衆入關討之天光旣至雍州以衆少不敵

逡巡未集榮大怒遣其騎兵參軍劉貴馳驛諸軍

加天光杖罰天光等大懼乃進討連破之

魏書爾朱榮傳

時万俟醜奴僭稱大號關中騷動榮遣岳討之榮
乃以天光爲驃騎大將軍雍州刺史以岳爲左大
都督及軍次潼關天光有難色岳曰蜀賊草竊而
已公尚遲疑若遇大敵將何以戰天光曰今日之
事一以相委公宜爲吾制之於是進軍拒戰於渭
北破之軍威大振天光與岳進至雍州榮又續遣
兵至時醜奴自率大衆圍岐州遣其大行臺尉遲
菩薩向武功南渡渭水菩薩攻柵已尅還岐州岳
以輕騎八百北渡渭擒其縣令二人獲甲首四百

級殺掠其民以挑菩薩菩薩率步騎二萬至渭北
岳以輕騎數千與菩薩隔水交言岳稱揚國威菩
薩自言強盛往復數返菩薩乃自矯踞令省事傳
語岳怒曰我與菩薩言卿是何人與我對語省事
恃隔水應答不遜岳舉弓射之應弦而倒時已逼
暮於是各還岳密於渭南傍水分置精騎數十爲
一處隨地形便置之明日自將百餘騎隔水與賊
相見岳漸前進先所置騎隨岳而集騎旣漸增賊
不復測其多投行二十里許便至淺水可濟之處

岳便馳馬東出以示奔遁賊謂岳走乃棄步兵南渡渭水輕騎追岳東行十餘里依橫崗設伏兵以待之賊以路險不得前進前後繼至半度崗東岳乃廻戰身先士卒急擊之賊便退走岳號令所部賊下馬者皆不聽殺賊顧見之便悉投馬俄而虜獲三千人馬亦無遺遂擒菩薩仍渡渭北降步卒萬餘收其輜重醜奴棄岐州北走

周書賀拔岳傳

夏四月癸未天光大破醜奴於岐州涇州

天光發進至岐與岳合勢軍於汧渭之間宣言遠

近曰今時將熟非可征討待至秋涼別量進止醜
奴謂以爲實分遣諸軍散營農稼在岐州之北百
里涇川遣其太尉侯伏侯元進領兵五千據險立
柵且耕且守在其左右千人已下爲一柵者乃復
數處天光知其勢分遂密嚴備脯時潛遣輕騎先
行斷路以防賊知於後諸軍盡發昧旦攻圍元進
大柵拔之諸所俘執並皆放散須臾之間諸柵悉
來歸款

魏書朱
天光傳

孝武帝永熙元年夏四月賀拔岳襲長安殺爾朱顯

壽

天光之東下也留其弟顯壽鎮長安召侯莫陳悅
欲與俱東岳知天光必敗欲留悅共圖顯壽宇文
泰曰悅雖爲將不能制物若先說其衆必人有留
心悅進失爾朱之明退恐人情變動乘此說之事
無不濟岳喜從之悅與岳襲長安歡以岳爲關西
大行臺岳以泰爲左丞事無巨細皆委之

綱目

周

文帝大統十一年冬十月治兵

十月大閱於白水遂西狩岐陽

周書文
帝紀

十三年冬十一月帝如岐陽

冬太祖奉魏帝西狩於岐陽

周書文
帝紀

武帝保定元年冬十一月帝如岐陽

十一月丁巳狩於岐陽十二月壬午至自岐陽

周書

武帝
紀

天和三年冬十月治兵十一月帝如岐陽

十月丁亥上親率六軍講武於城南京邑觀者輿

馬彌漫數十里諸蕃使咸在焉十一月甲辰行幸

岐陽十二月丁丑至自岐陽

周書武帝紀

建德二年春二月詔皇太子贊撫巡西土

二月甲寅詔皇太子贊撫巡西土三月己卯皇太

子於岐州獲二白鹿以獻詔答曰在德不在端

周書

武帝

紀

隋

高祖開皇元年冬十月帝如岐州

十月壬辰行幸岐州十二月庚子至自岐州

隋書高祖

紀

十三年春正月帝如岐州

正月壬戌行幸岐州二月丁亥至自岐州

隋書高祖紀



高祖武德元年冬十月岐州鄜州賊邵江海降

武德元年十月岐州鄜州邵江海自號新平王遣

隴州刺史叔孫老擊之江海率其衆來降

冊府元龜

太宗貞觀六年秋閏八月帝如岐州

貞觀六年閏八月帝在岐州皇太子來朝丙申宴

東宮官屬賜帛各有差乙巳宴岐州父老賜帛各

有差

冊府元龜

肅宗至德二載春二月帝至鳳翔

二月戊子上至鳳翔旬日隴右河西諸鎮皆會江

淮庸調亦至洋川漢中長安人聞車駕至從賊中

自拔而來者日夜不絕

通鑑

秋閏八月賊寇鳳翔遣兵敗之司馬王伯倫戰沒

閏八月辛未賊將寇鳳翔崔光遠行軍司馬王伯

倫叛官李椿率衆捍賊至中渭橋殺賊守橋衆千

人追擊入苑中時賊大軍屯武功聞之燒營而去

伯倫與賊血戰而死李椿力窮被執然自是賊不

敢西侵

舊唐書
肅宗紀

冬十月車駕入長安

九月癸卯收西京甲辰捷書至行在百僚稱賀卽

日告捷於蜀上皇遣裴冕入京啓告郊廟社稷十

月癸亥上白鳳翔還京

舊唐書
肅宗紀

上元元年夏六月鳳翔節度使崔光遠破党項於普

閏

上元元年六月鳳翔節度崔光遠奏破涇州隴州

等界羌渾党項等十餘萬衆又於普閏縣界破党

項四千餘衆斬二千級生擒一百餘人收獲駝馬

牛羊器械等不可勝數

冊府元龜

二年春二月羌寇鳳州刺史蕭悞死之

二月己未奴刺党項羌寇寶雞焚大散關寇鳳州

刺史蕭悞死之鳳翔尹李鼎敗之

唐書蕭宗紀

〔代宗〕廣德元年冬十月吐蕃寇鳳翔鎮西節度使馬

璘敗之

吐蕃寇邊詔璘移軍援河西懷恩之叛璘引還間

關轉鬪至鳳翔虜圍已合節度孫志直嬰城守璘

令士持滿外向突入縣門不解甲出戰背城陣虜

潰率輕騎追之斬數千級漂血丹渠

唐書馬璘傳

大歷五年二月鳳翔軍亂

二月戊戌李抱玉移鎮盩厔軍士忿怒大掠鳳翔

坊市數日乃定

通鑑

十年秋九月吐蕃寇隴州李抱玉敗之

九月癸丑吐蕃寇隴州鳳翔節度使李抱玉擊退

之

舊唐書
代宗紀

德宗建中四年冬十月鳳翔衙將李楚琳叛殺其節度使張鎰以應朱泚

張鎰爲鳳翔節度帝幸奉天鎰罄家貲將自獻行在而營將李楚琳者嘗事朱泚得其心軍司馬齊映等謀曰楚琳必爲亂乃遣屯隴州楚琳知之稽故未行鎰以帝在外心憂惑謂已亟去不爲備楚琳夜率其黨王玢李卓牛僧伽等作亂鎰追城走不及遠與二子皆爲候騎所執楚琳殺之

唐書張鎰傳

映爲行軍司馬德宗出奉天鎰儒緩不知兵部將

李楚琳素剽悍欲介賊爲亂映與齊抗請先事誅之鎰不用更示寬大徐謂楚琳曰欲以君使外若何楚琳恐夜殺鎰以應賊映雅爲軍中慕賴故得免奔奉天授御史中丞

齊映傳

建中四年帝避難遷於奉天以城隘不可久議幸鳳翔且依張鎰戶部尚書肅復聞之遽請見曰竊聞移幸鳳翔未審虛實帝曰有之復曰陛下大誤鳳翔將士皆朱泚舊兵今泚悖逆此中必有同惡相濟者臣尚慮張鎰不能久奈何擬幸鳳翔帝曰

朕行計已決試爲卿駐駕一日屬鳳翔後營將李

楚琳殺張鎰自爲節度使乃止

冊府元龜

十一月隴州戍將叛歸朱泚行營留事韋臯討誅之
初泚鎮鳳翔旣歸節而留兵五百戍隴上以部將
牛雲光督之至是雲光謀請臯爲帥將劫以臣泚
別將翟煜伺知以白臯雲光懼不克率衆出奔汧
陽遇泚奴使臯所謂雲光曰太尉已爲天子使我
以御史中丞授臯若聽固吾人也不受遂可誅之
請以兵俱許之臯迎勞先納奴僞受泚詔卽讓雲

光曰旣去而復何也對曰向未知公之命故去今
還願與公同生死皐曰大使苟無他圖請釋甲安
衆而後可入雲光以皐諸生無能爲乃命士委仗
鎧皐受而納其卒明日置酒大會奴雲光與其卒
至皐伏兵殺之以其首徇泚復使他奴拜皐鳳翔
節度使皐亦斬之

唐書韋
皐傳

興元元年秋七月車駕次鳳翔

上問陸贄今至鳳翔有迎駕諸軍形勢甚盛因此
遣人代李楚琳何如贄上奏以爲如此則事同脇

執以言乎除亂則不武以言乎務理則不誠不如
俟奠枕京邑徵授一官彼將奔走不暇安敢復勞
誅鉏哉戊午車駕發漢中秋七月丙子至鳳翔斬
喬琳蔣鎰張光晟等李晟以光晟雖臣賊而滅賊
亦頗有力欲全之上不許通鑑

貞元元年秋九月吐蕃逼好時鳳翔節度使李晟遣
兵於汧陽敗之

九月以吐蕃遊騎及好時上復遣張獻甫屯於咸
陽鳳翔節度使李晟以吐蕃侵軼遣其將王佖夜

襲賊營率驍勇三千人入汧陽戒之曰賊之大衆
當過城下甚勿擊其首尾首尾雖敗中軍力全若
合勢攻之汝必受其弊候其前軍已過見五方旒
虎豹衣則其中軍也出其不意乃是奇功似如其
言擊之衆果敗副將史廷光力戰死之又寇鳳翔
城下李晟出兵禦之一夕而退十月李晟遣兵襲
吐蕃之堆沙堡大破之焚其儲積斬蕃酋屈律
設贊等七人傳首京師

舊唐書
吐蕃傳

〔文宗〕太和九年冬十一月李訓等謀誅中宦不克訓

及舒元興王涯等皆死殺鄭注於鳳翔

鄭注先顯訓藉以進及勢相埒賴寵爭功不兩立
然方事未集乃出注使鎮鳳翔外爲助援內實猜
克待逞且殺之擢所厚善分總兵柄於是王璠爲
太原節度使郭行餘爲邠寧節度使羅立言權京
兆尹韓約金吾將軍李孝本權御史中丞陰許璠
行餘多募士及金吾臺府卒劫以爲用十一月壬
戌帝御紫宸殿約奏甘露降金吾左仗樹詔宰相
羣臣往視訓奏言非甘露帝顧中尉仇士良魚志

弘等驗之訓因欲閉止諸宦人使無逸者時璠行
餘列兵丹鳳門外訓呼兩鎮軍入邠寧軍不至璠
懼弗能前獨行餘拜殿下宦人至仗所約汗流不
能舉首士良等怪之會風動廡幕見執兵者士良
等驚走訓連呼金吾兵宦人曰急矣上當還內卽
扶輦決呆恩下殿趨訓攀輦曰陛下不可去士良
手搏訓而躡立言孝本領衆四百東西來上殿與
金吾士縱擊宦官死者數十人訓持輦愈急至宣
政門宦人郝志榮搤訓仆之輦入宮舒元興雖知

謀不以告王涯曰上將開延英邪會士良遣神策衛士五百出所值輒殺涯等惶懼易服出殺諸司史六七百人復分兵屯諸宮門捕訓黨千餘人斬四方館流血成渠俄而元輿涯皆爲兵所執涯實不知謀士良榜笞急乃自署反狀詔出衛騎千餘馳咸陽奉天捕亡者大索都城明日京城剽劫未止訓奔鳳翔爲蓋屋將所執傳其首餘黨悉擒皆腰斬梟首以徇

唐書李
訓傳

王守澄死注奏言守澄國勞舊願身護喪因羣宦

者臨送欲以鎮兵擒誅之訓畏注專其功乃先五日舉事注率五百騎至扶風聞訓敗乃還監軍張仲清用其將李叔和策訪注計事斬其首兵皆潰

去

鄭注傳

宣宗大中四年冬十一月羌入寇詔諸道兵討之

十一月党項羌寇邠寧十二月鳳翔節度使李安

業河東節度使李栻爲招討党項使

唐書宣宗本紀

僖宗廣明元年冬十二月鳳翔節度使鄭畋合鄰道

兵討賊

畋還鳳翔召將佐議拒賊皆曰賊勢方熾且宜從
容以俟兵集乃圖收復畋曰諸君勸畋臣賊乎因
悶絕仆地不能言會巢使者以詔書至監軍與之
宴樂奏將佐以下皆哭使者怪之幕客靳儲曰以
相公風痺不能來故悲耳民間聞者莫不泣畋聞
之曰吾固知人心尚未厭唐賊投首無日矣乃刺
指血爲表遣使詣行在召將佐諭以逆順皆聽命
刺血與盟完城塹繕器械訓士卒密約鄰道合兵
討賊鄰道皆許諾發兵時禁軍分鎮關中者尚數

萬畋使人招之皆至軍勢大振巢遣人齎詔召畋

畋斬之

綱目

中和元年春三月黃巢遣兵寇鳳翔都統鄭畋擊敗

之

賊將王璠率衆三萬來攻畋使弘夫

時唐弘夫爲畋行軍司馬

設伏以待璠內輕畋儒柔縱步騎鼓而前畋以銳

卒數千當賊疏陣而多旒幟乘高伐鼓賊不測衆

寡陣未整伏發衆皆囂日暮軍四合鏖戰龍尾坡

斬首二萬級積屍數十里多獲鎧仗璠遁去擒璠

子斬之威動京師

唐書鄭畋傳

冬十月鳳翔行軍司馬李昌言作亂鄭畋赴行在

行軍司馬李昌言屯興平遣麾下求爲南面都統
輒引兵趣府畋不意見襲登城好語曰吾方入朝
公能戢兵愛人爲國滅賊乎能則守此矣遂委軍
去昌言自爲留後衛畋出境旣半道內慚負卽辭
疾詔授太子少傅分司東都便醫於興元明年召
至行在拜司空門下侍郎平章事軍務一以咨決

唐書鄭

畋傳

光啓元年冬十二月李克用大破朱玫於沙苑帝奔

鳳翔

十二月癸酉官軍合戰爲沙陀所敗朱玫走還邠

州神策軍潰散遂入京師肆掠乙亥沙陀逼京師

田令孜奉僖宗出幸鳳翔

舊唐書僖宗本紀

二年春二月田令孜劫帝如寶雞

正月辛巳朔車駕在鳳翔李克用旋師河中與朱

玫王重榮同上表請駕駐蹕鳳翔仍數田令孜之

罪戊子田令孜迫乘輿請幸興元庚寅車駕次寶

雞舊唐書僖
宗本紀

夏四月朱玫奉襄王煚權監軍國事還長安

四月壬子朱玫李昌言追宰相蕭遘等於鳳翔驛

舍請嗣襄王煚權監軍國事玫自爲大丞相兼左

右神策十軍使遂驅率文武百寮奉襄王還京師

舊唐書僖
宗本紀

三年春三月車駕至鳳翔

三月甲申車駕還京次鳳翔以宮室未完李昌符

請駐蹕以俟畢工河中械送僞宰相裴澈鄭昌圖

命斬之於岐山縣

舊唐書僖宗本紀

夏六月李昌符作亂詔李茂貞討之

天威都頭楊守立與李昌符爭道麾下相毆帝命

中使諭之不止昌符遂擁兵燒行營守立與戰昌

符敗走保隴州詔遣茂貞討之

綱目

僖宗還次鳳翔李昌符亂興倉卒昭度質家族於

禁軍誓共討賊士感動乃平昌符

唐書韋昭度傳

李茂貞扈蹕東歸至鳳翔鳳翔節度使李昌符與

天威都頭楊守立爭道以兵相攻昌符不勝走隴

漳州僖宗遣茂貞追擊殺昌符以功拜鳳翔隴右節

度使

五代史李茂貞傳

文德元年春二月帝至自鳳翔

三月昭宗即位

二月己丑至自鳳翔庚寅謁於太廟大赦改元

唐書

僖宗

本紀

昭宗景福二年春正月以李茂貞鎮興元茂貞不奉

詔

茂貞自請鎮興元故有是命茂貞欲兼得鳳翔不

奉詔

綱目

秋九月李茂貞犯京師

九月乙亥覃王率扈駕五十四軍進攻岐陽屯於
興平李茂貞以兵逆戰屯於盤屋壬午岐兵進迫
興平王師自潰茂貞乘勝逼京師進屯三橋甲申
昭宗御安福門斬觀軍容使西門重遂內樞密使
李周潼遣中使賜茂貞詔令收兵歸鎮茂貞陳兵
臨臯驛數宰臣杜讓能之罪請誅之制貶讓能爲
雷州司戶十月賜讓能自盡

舊唐書昭宗本紀

乾寧三年秋七月李茂貞舉兵犯闕

初李克用屯渭北李茂貞韓建憚之事朝廷禮甚
恭克用去二鎮貢獻漸疎表章驕慢上自石門還
置殿後四軍使延王戒丕等將之茂貞遂表言延
王無故稱兵討臣臣今勒兵入朝請罪遂引兵逼

京畿

綱目

四年夏六月李茂貞圍覃王嗣周於奉天

六月乙卯以李茂貞爲西川節度使以覃王嗣周
爲鳳翔節度使覃王赴鎮茂貞不受代圍覃王於
奉天韓建移書茂貞解奉天之圍覃王歸華州上

欲幸奉天親討茂貞宰相切諫乃止通鑑

冬十月置鳳翔行營討李茂貞

以彰義節度使張璠爲鳳翔西北行營招討使以

討李茂貞削奪新西川節度李茂貞官爵通鑑

天復元年冬十一月韓全誨劫帝如鳳翔

韓全誨聞朱全忠將至令李繼麟李彥弼等勒兵

劫上請幸鳳翔是日開延英全誨等侍側李繼筠

遣兵掠內庫寶貨法物全誨遣人密送諸王宮人

先之鳳翔上遣中使召百官皆辭不至全誨陳兵

殿前言於上曰全忠欲劫天子幸洛陽求傳禪臣等請奉陛下幸鳳翔收兵拒之上不許拔劍登乞巧樓全誨等逼上下樓李彥弼卽於御院縱火上不得已與后妃諸王百餘人皆上馬慟哭而出李茂貞出迎上下馬慰接之還入鳳翔

綱目

朱全忠引兵逼鳳翔還取邠州

全忠軍駐赤水崔引令戶部侍郎王溥至赤水砦促全忠以兵迎駕戊午全忠自赤水趨長安崔引率文武百寮太子太師盧知猷已下迎於坡頭庚

申汴軍趨鳳翔戊辰至岐下全忠令判官李擇裴
鑄入城奏事言臣在河中得崔引書言奉密詔令
臣以兵士迎駕臣不敢擅自迎鑾昭宗怒引矯命
連詔全忠以兵士還鎮幸未全忠引軍離鳳翔退
攻邠州甲戌制崔引可責授朝散大夫邠州節度
使李繼徽以城降

舊唐書昭
宗本紀

全忠至鳳翔軍於城東茂貞登城謂曰天子避災
非臣下無禮讒人誤公至此全忠報曰韓全誨劫
遷天子今來問罪迎扈還宮岐王若不預謀何煩

陳諭上屢詔全忠還鎮全忠乃拜表奉辭移兵趣

邠州李繼徽請降

綱目

二年夏四月梁將朱友寧大敗岐兵於武功

天復二年四月友寧引兵西至興平及李茂貞戰

於武功大敗之

五代史梁太祖本紀

夏六月朱全忠圍鳳翔

崔引詣河中泣訴於全忠恐茂貞劫天子幸蜀宜

以時奉迎勢不可緩鳳翔人聞朱全忠且來皆懼

城外居民皆遷入城六月丁丑全忠軍於虢縣甲

申李茂貞大出兵自將之與朱全忠戰大敗丙戌
全忠遣其將孔勅出散關攻鳳州拔之丁亥全忠
進軍鳳翔城下全忠朝服嚮城而泣曰臣但欲迎
車駕還宮耳不與岐王角勝也遂爲五寨環之秋

七月孔勅取成隴二州

通鑑

秋八月鄜帥李周彝救鳳翔朱全忠遣兵擊敗之

秋八月鄜帥李周彝屯軍於三原以援鳳翔太祖
命懷英討之周彝拔軍而遁追至梨園因攻下翟
州擒其守來獻俄而岐軍屯奉天太祖令懷英寨

於岐軍之東北以備敵人一夕岐軍大至急攻其營懷英獨以三千餘人抗數萬之衆自乙夜至四

鼓岐軍不勝而退

冊府元龜

九月李茂貞攻朱全忠營岐兵大敗

梁祖宿兵岐下以迎昭宗敵壘尚堅且思班退親從指揮使高季昌抗言曰天下雄傑窺此舉者一載矣今姦黨已窘奈何更少俟之季昌乃密募人入岐爲告事者有騎卒馬景應命因朱友倫總騎軍且至將大出兵迓之景請因其時給駿駟雜出

隊中十許里躍馬西走逸岐圍以軍怨東遁爲告
言列寨留卒尚萬候夕將逝宜速掩之當落我機
內矣是往也必無生理願錄其孥梁祖凄然止其
行景固請乃徇之明日軍出諸寨屏匿如無人不
十里果策騎邾走岐入納之不失厥料岐軍啓兩
扉悉衆來我師宿已秣馬飽士中軍一鼓百營俱
進岐軍十不存三四李茂貞喪膽

北夢
瑣言

鳳翔食盡朱全忠奉表迎車駕

朱全忠遣幕僚司馬鄴奉表入城獻食物繒帛復

遣使請與茂貞連和修宮闕迎車駕上亦遣使齎
詔賜之鳳翔軍夜縋降汴軍者甚衆茂貞疑上與
全忠有密約增兵防衛是冬大雪城中食盡凍餓
死者不可勝計或卧未死肉已爲人所剮茂貞儲
侍亦竭以大琕供御膳上嚙御衣及小皇子衣於
市以充用

綱目

三年春正月車駕發鳳翔

正月甲子車駕出鳳翔幸全忠軍乙丑扶風令朱
友倫總兵侍衛丙寅次武功丁亥次興平宰臣崔

引率百官迎謁

舊唐書
昭宗紀

茂貞請遣使諭全忠軍詔崔構挾中人郭遵誨往
既行又命宮人寵顏馳見全忠諭密旨乃以蔣元
暉入衛二日茂貞獨見至日盱全誨恨甚自見勢
去計無所用帝召韓偓執手涕泗曰今先去四大
惡餘以次誅矣於是內養八輩候廷中投命每二
輩以衛士十人取一首俄而全誨等皆死是夜誅
韋處廷等二十二人悉以首納布囊詔送全忠曰
是皆不肯使乘輿東者既斬之矣全忠大喜徧告

軍中戎貞復誅小使李繼彝等十人於是開壘門
全忠猶攻北壘帝遣寵顏賜御巾箱寶器使罷兵
又捕殺中官七十人全忠亦使京兆誅黨與百餘
人天子入全忠軍全忠泥首素服待罪客省傳呼
徹三仗有詔釋全忠罪使朝服見全忠伏地泣曰
老臣位將相勤王無狀使陛下及此臣之罪也帝
亦嗚咽命韓偓起之解玉帶以賜召之食帝顧衛
兵或有憤發者因履係解曰全忠爲吾繫之全忠
跪結履汗浹於背而左右莫敢動

唐書韓
全誨傳

天子出幸梁軍遣使馳詔崔引引託疾不至王使人戲引曰吾未識天子懼其非是子來爲我辨之天子還至興平引率百官奉迎王自爲天子執轡且泣且行行十餘里止之見者咸以爲忠

五代史梁太祖

傳

帝至自鳳翔

天復三年正月己巳天子至自鳳翔素服哭於太

廟而後入殺宦者七百餘人

五代史梁太祖本紀

車駕入長安崔引奏以宦官典兵預政傾危國家

不剪其根禍終不已上從之全忠遂以兵驅第五
可範已下數百人盡殺之寃號之聲徹於內外其
出使外方者詔所在誅之止留黃衣幼弱者三十
人以備灑掃其兩軍八鎮兵悉屬六軍以引兼判

六軍十二衛事

綱目

梁趙珣昭宗天復元年徵爲同州節度留後時太
祖統軍岐下珣在馮翊輸輓調發旁午道途俄而

昭宗還長安詔徵八觀錫迎駕功臣之號

冊府元龜

冬十月李茂貞李繼徽舉兵逼京畿

朱全忠之克邠州也執靜難節度使楊崇本妻於河中而私焉崇本怒使謂茂貞曰唐室將滅父忍坐視之乎遂相與連兵侵逼京畿復姓名李繼徽全忠恐其復有劫遷之謀乃發兵屯河中

綱目

哀帝天祐五年夏六月邠岐蜀連兵攻長安不克而還

天祐五年六月鳳翔李茂貞邠州楊崇本會西川王建之師五萬攻長安汴將同州刺史劉知俊西京尹王重師以兵逆戰於漠谷邠岐不戰而退

冊府

元龜

後梁

太祖開平三年夏六月劉知俊以同州叛降於岐

知俊功益高太祖性多猜忌屢殺諸將王重師無
罪見殺知俊益懼不自安太祖已下鄜坊遣知俊
攻邠州知俊以軍食不給未行太祖幸河中使宣
徽使王殷召知俊其弟知浣遣人告知俊以不宜
來知俊遂叛臣於李茂貞以兵攻雍華執劉捍送
於鳳翔太祖使人謂知俊曰朕待卿至矣何相負

耶知俊報曰王重師不負陛下而族滅臣非背德
但畏死爾太祖復使語曰朕固知卿以此吾誅重
師乃劉捍誣我致卿至此吾豈不恨之耶今捍已
死未能塞責知俊不報以兵斷潼關太祖遣劉鄩

牛存節攻知俊知俊遂奔於茂貞

五代史劉知俊傳

四年秋七月岐人晉人攻夏州遣兵拒卻之

岐王遣使告晉請合兵攻定難節度使李仁福晉

王遣周德威將兵會圍夏州梁主恐晉兵襲西京

遣兵屯三原遣李遇邀其歸路岐晉兵皆解去

綱目

乾化元年夏四月岐攻興元蜀兵擊卻之

蜀主之女普慈公主嫁岐王從子繼崇繼崇驕矜

嗜酒蜀主召公主歸寧留之岐王怒始與蜀絕至

是岐王聚兵寇蜀興元唐道襲擊卻之

綱目

秋八月岐劉知俊擊蜀兵戰於青泥嶺敗之圍安遠

軍

岐王使劉知俊李繼崇將兵擊蜀王宗侃王宗賀

唐道襲王宗紹與之戰於青泥嶺蜀兵大敗王宗

浩奔興州溺死於江唐道襲奔興元先是王宗綰

城西縣號安遠軍宗侃等收散兵走保之知俊繼

崇追圍之

通鑑

蜀岐戰於興元岐師敗績

蜀王宗弼王宗播再敗岐兵蜀主如興元安遠軍
望其旂王宗侃等鼓譟而出與援軍夾攻岐兵大
破之拔二十一寨斬其將李廷志等岐兵解圍遁
去唐道襲先伏兵於斜谷邀擊又破之岐王左右
讒劉知俊岐王奪其兵李繼崇曰知俊壯士窮來
歸我不宜以讒廢之知俊舉族居於秦州

綱目

冬十二月高萬興敗岐兵於邠州

十二月延州節度使高萬興奏領軍於邠州界蒿

子谷韋家砦殺戮寧慶兩州賊軍約二千餘人並

生擒都頭指揮使及奪偽器等入奏召以銀器絲

物賜之

冊府元龜

末帝貞明元年夏五月岐人圍邠州不克

岐王遣彰義節度使劉知俊圍邠州霍彥威固守

拒之

通鑑

劉知俊爲同州節度使奔李茂貞邠州亂茂貞命

知俊討之時邠州都校尉李保衡納款於朝廷末
帝遣霍彥威率衆先入於邠知俊遂圍其城半載
不能下會李繼崇以秦州降於蜀知俊妻孥皆遷
於成都遂解邠州之圍

冊府元龜

霍彥威事梁遷邠寧節度使李茂貞遣梁叛將劉
知俊攻邠州彥威固守踰年每獲知俊兵必縱還
之知俊德之後不復攻

五代史霍彥威傳

冬十一月蜀遣兵攻岐劉知俊奔蜀蜀克鳳州

劉知俊攻霍彥威於邠州半歲不克聞秦州降蜀

妻子皆遷成都解圍還鳳翔懼及禍夜率親軍斬關奔蜀軍王宗綰自河池進兵會王宗瑤攻鳳州

克之

綱目

初汴將劉知俊奔鳳翔李茂貞以為大將稍侵建之興鳳皆沒焉後知俊自岐奔蜀建厚禮之任為

上將令擊茂貞復興鳳二州

冊府元龜

二年冬十月蜀攻岐取寶雞遂圍鳳翔

蜀王宗綰等出大散關大破岐兵遂取寶雞王宗播等出故關至隴州保勝節度使李繼安畏岐王

猜忌帥其衆二萬棄隴州奔於蜀軍蜀兵進攻隴

州以繼及爲西北面行營第四招討會王宗綰等

圍鳳翔岐兵不出會大雪蜀主召軍還

通鑑

蜀通正元年遣王宗綰等率兵十二萬出大散關

攻岐取隴州

五代史王
建世家

後唐

閔帝應順元年春正月以璐王從珂爲河東節度使

不受從珂舉兵鳳翔

四月以後璐王
卽位改元清泰

朱弘昭馮贇謀徙璐王從珂爲河東節度使遣使

監送赴鎮潞王旣與朝廷猜阻朝廷又命洋王從
璋權知鳳翔從璋性麓率樂禍前代安重誨鎮河
中手殺之從珂聞其來尤惡之謀於將佐皆曰離
鎮必無全理乃移檄鄰道言朱弘昭等專制朝權
懼傾社稷今將入朝以清君側以西都留守王思
同當東出之道遣郝詡等詣長安說以利害餌以
美妓思同謂將佐曰吾受明宗大恩今與鳳翔同
反借使事成而榮猶爲一時之叛臣况事敗而辱
流千古之醜迹乎遂執詡等以聞時潞王使多爲

鄰道所執唯隴州防禦使相里金傾心附之

通鑑

相里金爲隴州防禦使廢帝起兵鳳翔檄四鄰

四鄰未有應者獨金首遣判官薛文遇見廢帝往

來計事廢帝卽位德之拜保義軍節度使

五代史相里金

傳

二月遣兵討鳳翔三月官軍潰路王遂入長安

閔帝以思同爲西面行營馬步軍都部署三月會

諸鎮兵圍鳳翔破東西關城從珂兵弱而守甚堅

外兵死傷者衆從珂登城呼外兵而泣曰吾從先

帝二十年大小數百戰甲不解體金瘡滿身士卒
固嘗從我矣今先帝先棄天下朝廷信用姦人離
間骨肉我實何罪而見伐乎士卒聞者皆悲憐之
興元張虔釗攻城西督戰甚急士卒苦之反兵攻
虔釗走羽林指揮使楊思權呼曰潞王吾主也乃
引軍自西門入降而思同未知猶督戰嚴衛都指
揮使尹暉麾其衆曰城西軍入城受賞矣何用戰
耶士卒解甲棄仗聲聞數里遂皆入城降諸鎮之
兵皆潰思同挺身走至長安西京副留守劉遂雍

閉門不納從珂引兵東

五代史王
思同傳

冬十月蜀遣兵屯興州

九月詔鳳翔益兵守東安鎮以備蜀十月蜀李延

厚將果州兵屯興州興州刺史馮暉自乾渠引戍

兵歸鳳翔

通鑑

後晉

高祖天福三年冬十一月鳳翔軍亂討平之

鳳翔節度使李從曠厚文士而薄武人愛農民而

嚴士卒由是將士怨之會發兵戍西邊作亂剽掠

從曦發帳下兵擊之亂兵敗走至華州鎮國節度

使張彥澤邀擊盡誅之

綱目

後漢

高祖天福十二年冬十二月蜀遣兵數道入雍州

蜀主以王處回書招鳳翔節度使侯益以山南西
道節度使張虔釗爲招討使雄武節度使何重建
副之共將兵五萬虔釗出散關重建出隴州以擊
鳳翔奉鑾肅衛都虞侯李廷珪將兵二萬出子午
谷以援長安諸軍齊發旌旂數十里侯益請降於

蜀使吳崇惲持兵籍糧帳西還與趙匡贊同土表

請出兵平定關中

通鑑

隱帝乾祐元年春二月將軍王景崇擊蜀兵大破之

趙匡贊入見王景崇等至長安聞蜀兵已入秦川
發本道及趙匡贊牙兵千餘人同拒之恐匡贊牙
兵亡逸欲文其面微露風旨軍校趙思綰首請自
文面以帥下景崇悅齊藏珍竊言曰思綰凶暴難
制不如殺之景崇不聽蜀李廷珪聞匡贊已入朝
欲引歸景崇邀之敗廷珪於子午谷張虔釗至寶

雞侯益閉壁拒兵虔釗勢孤夜遁景崇追敗蜀兵
於散關俘將卒四百人景崇引兵至鳳翔侯益尚
未行景崇以禁兵分守諸門或勸景崇殺益景崇
以所受密旨嗣主未之知或疑於專殺猶豫未決
益聞之不告景崇而去景崇悔自詬及益入朝廢
帝問何故召蜀軍對曰臣欲誘致而殺之帝哂之

通鑑

夏六月邠州留後王景崇反遣兵討之

侯益至京師陰以事中景崇景崇心不自安諷鳳

翔將吏求已領府事朝廷患之拜景崇邠州留後以趙暉爲鳳翔節度使景崇乃叛盡殺侯益家屬與趙思綰共推李守貞爲秦王隱帝卽以趙暉討

之

五代史王景崇傳

秋九月蜀兵援鳳翔都部署趙暉等擊敗之

乾祐元年九月鳳翔都部署趙暉奏大破川兵於

大散關殺三十餘人其餘棄甲而遁

冊府元龜

冬十月趙暉圍王景崇於鳳翔蜀兵救之不克

景崇遣兵出西門趙暉擊破之遂取西關城景崇

退守大城暉塹而圍之數挑戰不出暉潛遣千餘人環甲執兵效蜀旂幟循南山而下令諸將聲言蜀兵至矣景崇果遣兵數千出迎之暉設伏掩擊盡殪之自是景崇不敢出蜀主遣南山節度使安思謙將兵救鳳翔又遣雄武節度使韓保貞引兵出汧陽以分漢兵之勢安思謙屯石界漢兵屯寶雞思謙遣申貴將兵二千設伏於竹林以兵數百壓寶雞而陳漢兵逐之遇伏而敗蜀兵逐北破寶雞寨蜀兵去漢兵復入寶雞思謙進屯渭水漢益

兵五千戍寶雞思謙畏之退屯鳳州尋歸興元通鑑

二年冬十二月叛將王景崇自殺鳳翔平

守貞思綰相次皆敗景崇客周璨謂景崇曰公能
守此者以有河中京兆也今皆敗矣何所恃乎不
如降也景崇曰誠累君等然事急矣吾欲爲萬有一
得之計可乎吾聞趙暉精兵皆在城北今使公
孫輦等燒城東門僞降吾以牙兵擊其城北兵不
成而死猶勝於束手也璨等皆然之遲明輦燒東
門將降而府中火起景崇自焚矣輦乃降暉五代史王

景崇傳

三年春正月詔收葬鳳翔遺骸

遣使詣河中鳳翔收瘞戰死及餓殍遺骸通鑑

後周

世宗顯德二年夏四月遣鳳翔節度使王景帥師代

蜀

顯德二年四月詔鳳翔節度使王景攻收秦鳳二
州以曹州節度使韓通充西南面行營都虞侯五
月王景上言今月七日收下黃牛等三砦相次又

收下黃花等五砦其鄉村人戶並已招攜安撫

府冊

元龜

秋九月王景擊蜀兵於黃花敗之

蜀李廷珪遣奇兵出斜谷屯白澗又分兵出鳳州
之北唐倉鎮及黃花谷絕周糧道王景遣裨將張
建雄將兵二千抵黃花又遣千人趣唐倉拒蜀歸
路蜀王巒將兵出唐倉與建雄戰於黃花蜀兵敗
奔唐倉遇周兵又敗虜巒及其將士三千人兵皆

潰

通鑑

宋

高宗紹興十年

金熙宗天眷三年

秋九月統制楊從儀襲敗

金兵於鳳翔

九月丁未楊政遣統制楊從儀夜襲金人於鳳翔

府敗之

宋史高宗本紀

十一年

金皇統元年

春正月楊從儀擊金兵渭南敗之

正月癸卯鳳翔統制楊從儀敗金人於渭南

宋史高宗

本紀

三十二年

金世宗大定二年

春閏二月吳璘復大散關

閏二月吳璘遣楊從儀等攻拔大散關分兵據和

尚原金人走寶雞

宋史高宗本紀

冬十二月吳璘拒金兵於鳳翔詔璘班師

金以重兵扼鳳翔爭吳璘新復十三州三軍璘亟

馳德順以備之已而金蒲察世傑率師十萬來攻

璘力戰拒之時議棄三路遂詔璘班師

通鑑

寧宗嘉定十一年

金宣宗興定元年

夏四月金兵破黃牛堡

統制吳政拒卻之

金兵合長安鳳翔之衆復犯大散關守將王立遁

又犯黃牛堡吳政拒卻之政至大散關執立斬之

以狗事聞進政三官

宋元通鑑



〔太宗〕天會六年

宋高宗建炎二年

春二月取宋鳳翔

金婁宿旣陷永興鼓行而西勢益張引兵犯熙河
經畧使張深遣都監劉惟輔以精騎二千禦之夜
趨新店金人恃勝不虞黎明軍進惟輔舞稍刺其
帥黑鋒洞胷墮馬死深更檄張嚴往追之嚴追婁
宿及鳳翔境上銳意擊賊至五里坡婁宿伏兵坡

下嚴與曲端期不至徑前遇伏戰不利死之婁宿

昭鳳翔守臣劉清臣棄城去

宋元通鑑

八年

宋建炎四年

秋九月元帥宗輔等敗宋軍於富平耀

州鳳翔皆降

宋張浚兵取陝西帝至洛水治兵張浚騎兵六萬

步卒十二萬壁富平帝至富平婁室爲左翼宗弼

爲右翼兩軍並進自日中至昏暮凡六合戰破之

耀州鳳翔府皆來降

金史睿○婁室一作婁宿
宗世紀

熙宗天眷三年夏六月陝西平

金兀朮以歸陝西爲非計及撻懶誅遂命撒離喝

出河中趨陝西撒離喝入同州趨永興軍權知軍

事郝遠開門納之陝西州縣所至迎降遂進據鳳

翔初關陝新復朝廷分軍屯熙秦廊延諸路撒離

喝既至鳳翔陝西諸軍皆隔在後遠近震恐宋元通鑑

海陵正隆六年宋紹興三十一年秋九月克宋大散關是年十月

世宗立改元大定

九月徒單合喜由鳳翔取散關金史海陵紀

宣宗元光元年冬十一月元兵趨長安遂圍鳳翔

宣元大將蒙古不花攻鳳翔朝廷以主將完顏仲元
孤軍不足守禦命赤盞合喜將兵援之

金史赤盞合喜傳

二年春二月鳳翔圍解

元光二年元木華黎國王斜里吉不花等及夏人
步騎數十萬圍鳳翔東自扶風岐山西連汧隴數
百里圍皆其營柵攻城甚急合喜盡力禦之元師
乃退

金史赤盞合喜傳

哀宗正大八年春正月元兵圍鳳翔夏四月克之

正月元兵圍鳳翔府四月元兵平鳳翔府兩行省

棄京兆遷居民於河南

金史哀宗本紀

四月蒙古圍鳳翔府金行省合達蒲阿逗遛不進
金主遣樞密判官白華往諭之合達蒲阿言北兵
熱盛不可輕進白華還金主復遣諭以鳳翔圍久
恐守者不能支可領軍出關畧與渭北軍交手北
軍聞之必當奔赴少紓鳳翔之急合達蒲阿乃始
出關行至華陰界與渭北軍交戰比晚收軍入關
不復顧鳳翔矣蒙古遂取鳳翔合達蒲阿遷京兆
民於河南使完顏慶山奴戍之

宋元通鑑

元

英宗至治二年春三月鳳翔黃冠王道明作亂伏誅

至治二年三月鳳翔道士王道明妖言伏誅

元史英宗

本紀

順帝至正十七年冬十月偽宋將陷興元遂圍鳳翔

察罕帖木兒擊走之

至正十七年十月白不信大刀敖李喜喜陷興元

遂入鳳翔

元史順帝本紀

不信等既陷秦隴遂窺鳳翔察罕帖木兒即先分

兵八守鳳翔城而遣諜者誘不信圍鳳翔凡數十
重察罕帖木兒自將鐵騎晝夜馳二百里往赴比
至去城五里所分軍張左右翼掩擊之城軍亦
鼓譟而出內外合擊呼聲動天地不信等大潰及
李喜喜皆遁入蜀

通鑑
續編



太祖洪武二年春三月徐達等克鳳翔李思齊遁走
進狗鳳隴諸州下之

三月常遇春馮宗異帥師發陝西進克鳳翔初李

思齊之奔鳳翔也上以書諭之曰昔足下在秦中
兵衆地險雖有張思道專尚詐力孔興等自爲保
守橫廓以兵出沒其間然皆非勁敵足下不能圖
秦自王已失此機今中原全爲我有向與足下相
爲犄角者皆披靡竄伏足下孤軍相持徒傷物命
終無所益足下誠能以信相許翻然來歸當以漢
竇融之禮相待否則非朕所知也思齊得書有降
意其麾下誘之與西入吐蕃思齊惑之至是大兵
至鳳翔思齊懼遂帥所部奔臨洮叅政傅友德克

鳳州以指揮張能守之夏四月丙寅大將軍達會
諸將於鳳翔留御史大夫湯和守營壘輜重令指
揮金興旺余思明等守鳳翔遂移師趨隴州克之
明紀事
本末

三年秋八月元將賀宗哲寇鳳翔

賀宗哲聞王師攻慶陽乃引兵攻鳳翔或隧地或
實至甕城凡十五日指揮金興旺周興嬰城固守

至是慶陽下宗哲乃由六盤山遁去

紀事
本末

愍帝崇正七年秋七月鳳翔守臣殺賊陳奇瑜奏逮

之

七月辛卯賊至鳳翔藉口奉督撫檄安插城內守

臣知其詐給以門不敢啓須縋城上先登三十六

人盡殺之總督陳奇瑜因借爲辭劾地方官紳撓

僨撫局命緹騎逮寶雞知縣李嘉彥鳳翔鄉紳孫

鵬等下獄

紀事本末

七年秋流賊自漢中來大肆殺掠總督陳奇瑜怯
戰更事招徠賊陽爲受撫陰就城關奪掠邑進士
孫鵬居東關與賊格鬪射殺其目奇瑜忌之誣以

擅殺安官劾送京師下獄鵬既辯寃時廷臣亦有

條其縱寇者始得免自是連年被其焚劫

邑舊志

八年流賊自商南至鳳翔

官吏督鄉兵禦之邑庠生屈學會素有膽力鼓勇

先登擊賊於陳村鎮不利死之

邑舊志

九年冬十月流賊自靈臺來焚劫殺掠民不堪命

十六年冬十一月李自成陷延安復陷鳳翔屠之

總兵王定高傑自渭南敗各率所部奔延安自成

命賊將田斌守西安自往塞上高傑聞賊至以兵

渡河而東入山西王定奔榆林自成陷延安大會

羣賊馬萬匹旌旄數十里於米脂祭墓以五百

騎按行鳳翔守將誘而殲之自成怒親攻鳳翔陷

之屠其城

紀事本末

冬十月總督孫傳庭敗死汝邲潰兵西奔鳳翔大

擾賊乘勝趨潼關破西安渠黨劉體純等二十八

日至鳳翔屯兵東關十一月朔城陷知府唐時明

自縊邑紳韋棫被殺士民之禦賊死者殉義死者

不可勝數

邑舊志

國朝

世祖順治元年賊李自成敗走辰州被鄉兵誅死

元年李自成僭號西安逼陷京師愍帝遇害

天兵一擊賊敗於山海關狼狽走西安尋自西安出商洛

奔辰州自成爲鄉兵所誅死賊黨潰散

易知錄

二年冬十二月賀珍寇鳳翔總督孟喬芳擊誅之

冬十二月十五日漢中叛寇賀珍襲鳳翔入城殺

千餘人填屍井中毀城堞焚四門邑紳王者賓遇

害賊進攻西安不克奔柰州總督孟喬芳追擊至

漢中誅之

邑舊志

聖祖康熙十三年吳三桂以滇南叛十五年提督王輔臣以平涼叛川陝總督哈占撫遠大將軍圖海奉詔會兵討平之

十三年吳三桂叛滇南四方震動關中戒嚴十五年提督王輔臣叛據平涼鳳翔告警賴川陝總督哈占並撫遠大將軍圖海受

命視師先從大泥峪進薄鎮安復進攻兩河關叛逆削平

平涼受撫而鳳翔不知有兵矣

邑舊志

祥異

漢

武帝元狩元年上郊雍獲一角獸若麋然有司曰陛

下肅祇郊祀上帝報享錫一角獸蓋麟云史記武帝本紀

征和四年二月丁酉隕石於雍二聲聞四百里漢書

武帝本紀

宣帝元康二年夏神雀集雍宋書符瑞志

後漢

和帝元興元年五月癸酉右扶風雍地裂五行志

晉

武帝太康四年十二月嘉禾生扶風雍木連理生扶

風

宋書符瑞志

十年六月嘉禾生扶風雍一莖四穗是歲收三倍

冊府

元龜

北魏

肅宗熙平二年正月金出岐州橫水縣

靈徵志云按通志建置北

魏於岐州析置橫水縣屬平秦郡治

隋

文帝仁壽二年四月岐雍地震京房易飛侯曰地動

以夏四月五穀不熟人大飢

五行志



高宗永淳元年六月雍岐隴等州蝗

五行志

元宗先天二年岐隴飢

五行志

開元八年十二月岐州獲白燕獻之

冊府元龜

肅宗至德二載釋元皎於鳳翔開元寺置御藥師場

忽於法會內生一叢李樹有四十九莖元皎等表

賀帝喜曰此大瑞應答勅云瑞李繁滋國之興兆

生在伽藍之內足知覺樹之榮感此殊祥與師同

慶

高僧傳

代宗

大歷八年五月丁丑嘉禾生一莖三穗

冊府元龜

十月丁卯獲白鼠獻之

冊府元龜

十一月甲寅嘉禾生一莖三穗

冊府元龜

九年十月辛卯嘉禾生一莖兩穗

冊府元龜

十年三月癸未獲白雀一獻之

冊府元龜

僖宗廣明元年正月鳳翔等處地震

光啓二年四月僖宗在鳳翔馬尾皆咤蓬如簞咤

怒象

五行志

昭宗天復二年帝在鳳翔十一月丁巳日南至夜驟風有鳥數千迄明飛噪數日不止自車駕在岐常有鳥數萬棲殿前諸樹岐人謂之神鴉

五行志

天祐二年昭宗遷於鳳翔朱梁率諸道甲馬奉迎車駕時侯王將帥在岐下者皆以珠顆盤幘腳貫以銀線而簪之入軍人咸以珠飾巾競相誇尚及朱梁篡位乃知朱已居人土者久矣

秦再思記異

宋

太宗太平興國九年七月青楊木連理海

淳化元年旱

五行志

真宗大中祥符七年二月天慶觀甘露降

五行志

八年五月麥二岐又獻芝草合歡瓜

玉海

九年知鳳翔府趙湘獻嘉禾圖

五行志

神宗熙寧九年五月麥秀兩岐仍一本有三四穗或

五六穗者

五行志

徽宗大觀四年飢

五行志

宣和五年夏旱

五行志

金

宣宗貞祐四年五月蟲重傷麥七月旱五行志

元

世祖至元三年十二月旱世祖本紀

二十六年十一月屯田大水世祖本紀

仁宗延祐五年四月雨雹傷麥禾五行志

泰定帝泰定二年飢五行志

四年七月蚱蜢害稼五行志八月地震泰定本紀

文宗天歷二年大飢五行志

至順元年七月隕霜殺稼

五行志

順帝至正十八年春夏皆大旱人相食

五行志

明

成祖永樂三年七月鳳翔縣進瑞麥三十本

世法錄

武宗正德十六年四月甘露降

通志

世宗嘉靖七年大旱斗米千錢人相食

舊志

八年蝗自東來羣飛蔽天十二月地震如雷

舊志

穆宗隆慶二年正月地震二次有聲

續文獻通考

神宗萬曆十三年大飢斗米千錢餓殍載道

舊志

二十三年地震有虎入城西北隅舊志

四十年八月與國里封君袁餉地產嘉禾一莖數

穗者數百本邑令李榮上嘉禾頌舊志

熹宗天啓二年八月地震有聲舊志

愍帝崇正三年西街民家豬產象隨死舊志

六年夏旱秋無禾大飢民食樹皮頭面發腫死舊志

八年雨灰三日舊志

九年府學前有烏集地數萬爲陣方能應矩舊志

十年八月蝗飛蔽天舊志

十一年二月蝻生食麥六月蝗食禾大飢

通志

十二年二月大鼠成羣食牛人人腹食嬰兒見骨

四月有星隕於居民袁回家不及地旋轉如冶金

良久漸高飛去照數十里

二申野錄

十三年春旱夏無麥飢民流移載道死者枕藉

舊志

十四年大飢疫居民闔室盡斃至野無烟

舊志

十五年三月陰霾雨土日無光冬西街民家豬產

子二首一身背上復有四蹄

舊志

十六年秋鸚鵡大至棲城樹皆滿旬日乃去

舊志

十七年夏鸚鵡又至如前

舊志

國朝

世祖順治三年正月天鼓鳴七月又鳴

舊志

四年秋七月霪雨害稼十月大雨雪

舊志

五年鸚鵡至春地震秋不雨冬無冰

舊志

六年秋七月蝗

舊志

七年夏秋霪雨害稼八年亦如之

舊志

九年大水夏雨雹

舊志

十年夏雨雹深一二尺旬日不消草木如隆冬秋

大水冬十月桃杏復華

舊志

十一年夏四月大雪盈尺果樹皆折死六月初八

夕地大震人畜驚仆不能立牆屋倏傾倏起幾至

顛覆次日復動如是旬日乃止

舊志

十二年春不雨牛疫夏雨雪殺禾大疫

舊志

天雨菽

麥豌豆

通志

十三年民間訛言大婚嫁長幼多至失倫

舊志

十四年春隕霜殺麥夜空中有火夏雨雹冬又訛

言婚嫁如前

舊志

十五年春三月天雨蒱粒微小秋雨害稼冬十有

一月沙雞至占歲當飢

舊志

十六年夏四月野多妖青白晝擲瓦壞人飲食

是歲九頭鳥過聲若笙簧

舊志

十七年春雨雹白鳥見冬大雨雪

舊志

十八年春三月隕霜害稼夏雨雹

舊志

聖祖康熙元年秋七月大雨

郡志

三年春雨雹多風秋旱禾不登

舊志

四年元日大風秋雨雹如斗

舊志

五年秋地震

舊志

六年夏四月隕霜壞稼夏秋飢

舊志

八年九年歲歉

舊志

十八年飢

通志

三十年旱大飢民取草根木皮屑食

郡志

三十一年飢饉大疫

舊志

三十二年東鄉申都里北光瑤夏麥穗兩岐及三

四岐

舊志

三十三年秋永生兩岐

舊志

三十四年地震大有年斗麥錢二十文郡志

三十七年大有年郡志

四十七年地震舊志

五十二年地震舊志

五十七年歲歉地震舊志

五十九年旱大飢舊志

六十年旱郡志

世宗雍正元年夏秋大有年郡志

二年夏秋大有年郡志

三年夏秋大有年穀禾有一莖二三穗者

郡志

六年夏秋大有年

郡志

七年夏秋大有年

郡志

九年夏秋大有年

郡志

今上乾隆十三年春三月隕霜殺麥大飢

郡志

十七年秋大旱無禾

增補

二十一年秋大雨

增補

三十年七月初一日卯刻地微震十八日辰刻又

震申刻又微震

增補

廿五年冬十二月

志

雜記

政和間李朝孺爲陝西轉運遣人於鳳翔府破商比干墓

得銅盤徑二尺餘中有款識二十六字

墨莊漫錄○按何比干係漢平

陵人此或何墓云商者誤

歐文忠曰十鼓之文可見者四百六十五字不可識者過半卽韓歌所謂牧童敲火牛礪角年深豈免有闕訛者也其可曉者有曰我車旣攻我馬旣同者車攻語也有曰其魚維何維魴及鯉何以標之惟楊及柳則兼記田漁也凡數語可讀者蘓文忠所謂衆星錯落僅名斗者

也

雍錄

右石鼓文周宣王之獵碣也唐自貞觀以來蘓最李嗣真張懷瓘竇泉竇蒙徐浩咸以爲史籀筆蹟虞世南歐陽詢褚遂良皆有墨妙之稱杜甫八分小篆歌叙歷代書亦厠之倉頡李斯之間其後韋應物韓愈稱述爲尤該至歐陽修作集古錄始設三疑以韋韓之說爲無所考據後人因其疑而增廣之岐陽石古文有謂爲周宣王獵碣者惟董程二氏以左傳成有岐陽之蒐證之皆鑿鑿有據其畧云考之書天子大蒐會諸侯施命令非

常事也史不得無書若宣王蒐岐卽周史失之列國不

得並逸胡後世無聞焉則爲成王信矣

郭宗昌岐陽石古文跋

又鼓有十因其石之自然粗有鼓形字刻於其旁石質堅頑類今人爲碓礮者其初散在陳倉野中韓吏部爲博士時請於祭酒欲以數橐駝輿致太學不從鄭餘慶始遷之鳳翔孔子廟五代之亂又復散失司馬池知鳳翔復輦至於府學而亡其一皇祐四年向傳師搜訪而

足之

王厚之跋岐陽石鼓文後

終南古敦銘蘓軾爲鳳翔府判官得古器於終南山下其

形制與今三禮圖所畫及人家所藏古敦皆不同其銘

有寶尊敦之文遂以爲敦耳

六一
題跋

詛楚文有三告巫咸文在鳳翔東坡鳳翔八觀詩嘗紀其
事舊在府解徵歸御府述秦穆公與楚成王相好及熊
相倍十八世詛盟之罪以史記世家年表考之秦自穆
公十八世至惠文王與楚懷王同時此詛爲懷王也王

之書詛
楚文後

百里奚爲秦相作樂所賃澣婦自言知音呼之援琴撫弦
而歌曰百里奚五羊皮臨別時烹伏雌炊扚屨今曰富

貴忘我爲因問之乃其妻云

事文類聚

馬嵬佛堂楊妃綸所邇後才士經過賦詠以道其幽怨不

可勝紀皆以翠翹香鈿委於塵泥紅淒碧怨令人傷悲
雖調苦詞清無逃此意也丞相鄭畋爲鳳翔從事日題
詩曰終是聖明天子事景陽宮井又何人觀者以爲真

輔國之句

闕史

秦穆公出狩天震大雷下有火化爲白雀啣丹書集公車

曰秦伯霸

尚書中侯

秦穆公寢疾七日而寤寤之日告公孫支與子輿曰我之

重刊鳳翔縣志 卷之八 三
秦穆公所甚樂吾所以久者適有學也帝告我晉國將大亂
五世不安其後將霸未老而死霸者之子且令而國男
女無別公孫支書而藏之秦識於是出矣而後世皆曰

秦穆公上天

史記

秦穆公時陳倉人掘地得物若羊非羊若豬非豬牽以獻
穆公道逢二童子曰此名爲媚常在地食死人腦若欲
殺之以栢插其首媚曰彼二童子名爲陳寶得雄者王
得雌者霸陳倉人捨媚逐二童子童子化爲雉飛入平
林陳倉人告穆公穆公發徒大獵果得其雌又化爲石

置之汧渭之間至文公時立陳寶祠其雄飛至南陽今
南陽雉縣是其地也秦欲表其符故以名縣每祀陳寶
時有赤光長十餘丈從雉縣來入祠中有聲殷殷如雄
雉其後光武起於南陽

晉于寶搜神記
○史記作文公

秦穆公伐晉及河將勞師而醪惟一鐘蹇叔勸之曰雖一
米可投之於河而釀也於是乃投之於河三軍皆醉酒
秦穆公亡善馬岐下野人共得而食之者三百餘人吏欲
法之公曰君子不以畜害人吾聞食馬肉不飲酒傷人
皆賜酒而赦之三百人者聞秦擊晉皆推鋒爭死以報

食馬之德

史記秦本紀

秦康公築臺三年荆人起兵將以攻齊任妄曰饑召兵疾召兵勞召兵亂召兵君築臺三年而荆人起兵臣恐其以攻齊爲聲而以襲秦爲實也請備之於是戍東邊而荆人輟行

韓非子

蘓亮武功人仕西魏爲岐州刺史朝廷以其牧本州特

給路車鼓吹先還其宅并給騎士三十列羽儀遊鄉黨

經過故人歡會旬日然後入州世以爲榮

冊府元龜

李道威通末爲鳳翔府士曹因推發掘塚賊問其所發

云爲盜三十年咸陽之北岐山之東古塚皆開發嘗入
一塚自挺道直下三十餘尺得一石門門內箭出不已
如是百餘發不復有箭以物撞開之一盜先入俄爲輪
劍所中死門內十餘木人周轉運劍其疾如風勢不可
近以木橫拒之機關遂定盡拔去其刃因至其中但見
帳幄儼然罽毼舒展遍於座上有漆燈甚明木偶人與
姬妾皆偶去地丈餘有皮裹棺柩鐵索懸挂焉以木撞
之纔動其棺卽有砂流下如水逡巡不可止流溢四面
奔馳出門砂已深二尺餘良久視之砂滿塚內不可復

入竟不知何人之墓又一墓在咸陽原上旣入得鏡兩面可照人鼻在側畔背面瑩潔如新磨畢以面照之如常無異以背照之形狀備足衣冠儼然而倒立也

錄異記

鄭文公畋小字桂兒時西門思恭爲監軍有詔徵赴闕畋父亞饌於北郊以畋託之曰他日願以桂兒爲念言訖流涕思恭誌之及爲神策軍中尉亞已卒思恭使人召畋愛如甥姪因選師友教導之畋後官至將相黃巢入長安思恭逃難於終南山畋厚募訪獲之以歸岐下溫清侍膳如父焉思恭終畋葬於鳳翔西岡未幾畋亦卒

葬近西門之墳百官造二壠以弔之無不墮淚咸服其

義也

北夢
瑣言

郭忠恕善畫屋木林石郭從儀鎮岐下每延止山亭張素
設粉墨於傍經數月忽乘醉就圖之一角作遠山數峯
而已郭珍惜之岐有富人主官酒酤其子善畫日給醇
酎設几案絹素及好紙數軸屢以情言忠恕俄取紙一
軸畫一小童持線車紙窮處作風鳶中引一線長數丈
富家子不以爲奇遂謝絕

圖畫見
聞誌

范純甫官鳳翔時年尚少家人每見其卧齋中忽蹶起著

公服執手板危坐久之率以爲常竟莫識其意常從容
問之答曰吾時忽念天下安危事以天下安危爲念豈
可不敬耶

墨客
揮犀

烈王二年周太史儋見秦獻公曰始周與秦國合而別別
五百載復合合十七歲而霸王者出焉應劭曰周孝王
封伯翳之後爲侯伯與周五百載至昭王時西周君臣
自歸獻其邑三十六城合也索隱曰自周以邑入秦至
始皇初立政由太后嫪毐至九年誅毐正十七年

史記
秦本

紀注

僕射士孫瑞謀誅董卓有人書吕字於布上負而行歌於市曰布乎有告卓者卓不悟帝大會未央殿卓朝升車既而馬驚墮泥還入更衣其少妻止之卓不從遂行吕

布持矛刺卓趣兵斬之

後漢書董卓傳

北周明帝爲岐州刺史公堂上時有圓雲若蓋五色相間經時而滅州人以其下有寶器韋敬遠獨曰此天子

氣也及閔帝廢迎立之

嘉蓮燕語

李晟爲將軍嘗謁桑道茂茂云異日爲京兆尹慎少殺人西平曰武夫豈有京兆尹之望後興元收復西平兼

京尹時桑公在俘囚中當斷之際告西平公忘少殺人

之言耶西平釋之

傳載畧

廣明年中鳳翔副使鄭昌圖未及第前欲罷舉時同里親表家僕自宋亳至告其主人云昨於穀水店逢見二黃衣使人同行至華嶽廟前二使曰吾二人乃今年送榜之使也自泰山來到金天處押署宰相遇僕遂請竊窺其榜使者曰不可汝但記之遂畫其地曰此年狀頭姓偏傍有卩名兩字下一字在口中榜尾之人姓偏傍亦有此卩名兩字下一字亦在口中遂去鄭公親表頗異

其事遂訪岐副具話之且勉以就試昌圖其年狀頭及

第榜尾鄒希回也姓名畫點皆同

玉堂閑話

鄭

注鎮鳳翔日有草如茵生於紫金帶上注喜謂芝瑞

注又嘗置藥篋藥化青蠅數萬飛去注頗惡之未踰月

被誅

杜陽雜編

初廢帝起於鳳翔與共事者五人客將房嵩喜鬼神巫祝
之說有瞽者張濛自言事太白山神神魏崔浩也其言
吉凶無不中嵩素信之嘗引濛見帝聞其語聲驚曰非
人臣也嵩使濛問於神神傳語曰三珠併一珠驢馬沒

人驅歲月甲庚午中興戊巳土嵩不曉其義使問濛濛
曰神言如此我能傳之不能解也帝卽以濛爲館驛巡
官帝將反而兵少又乏食由此甚懼使嵩問濛濛傳神
語曰王當有天下可無憂王思同圍鳳翔廢帝懼又遣
嵩問神神曰王兵少東兵來所以迎王也已而東兵果
叛降於帝帝入京師卽位之日冊曰維應順元年歲次
甲午四月庚午朔帝廻視房嵩曰張濛神言豈不驗哉

五代史
唐臣傳

晉李專美字翊商京兆人後唐末帝鎮鳳翔專美爲記室

在岐下曾夢具裳簡立高山之頂及爲端明殿學士與

李崧同列而班在其上

冊府元龜

秦穆公時扶風獲一石佛公不識棄馬坊中由余往觀之

曰此佛也穆公取安清淨處

墨池浪語

穆公女弄玉有容德簫史爲燒水銀作粉與塗名飛雲丹

天祿餘識

李釋諫議知鳳翔旣卒有蝴蝶數萬自殯所以至府宇

蔽映無下足處府官祭奠接武不相辨揮之不開踐踏

成泥其大者如扇逾月方散

癸辛雜識

鳳翔知客郭璩其父曾主作坊將解一木其間疑有鐵石
鋸不可入遂以新鋸兼焚香祝之其鋸乃行及破木文
有二馬形一黑一赤相齧其口鼻鬚尾蹄腳筋骨與生

無異

聞奇錄

同光二年五月故秦王李茂貞遣使王修進遺留禮物水

晶鞍盤玉帶瑪瑙酒杯翡翠爵琉璃瓶玳瑁唾盂銀蓮

花座珊瑚樹一株軍器緡絲錦等

冊府元龜

王蜀將田承肇戍鳳翔憩於林下忽見靜地中有小樹一

莖高數尺並無柯葉尤甚光滑肇就之翫弄以手上下

摩娑頃刻手指如中毒苦不禁於是歸營臂膊已麤於
桶時村嫗善禁居深山中急使人召得嫗曰此胎生七
寸蛇戲處噴毒在樹間捫著枝立合致卒急使人就彼
斫之果獲二蛇斃之嫗遂禁勒自膊間趁漸漸下至於
腕又併趁入食指盡食指一節趁之不出覺成一球子
許肉丸遂以利刀斷此一節所患方除

玉堂
閒話

東坡題鳳翔東院王畫壁云嘉祐癸卯上元夜來觀王維
摩詰筆時夜已闌殘燈耿然畫僧踽踽欲動恍然久之

東坡
題跋

東坡云永樂有無核棗人不可得予在岐下亦得食一枚

蕪東坡集

李靖爲岐州刺史人或告其謀反高祖命御史按之謂

曰靖反且實便可處分御史知其誣同行數驛佯失告

狀驚懼鞭撻行典乃祈求於告事者曰李靖反狀分明

親奉進旨今失告狀幸救某命更請狀告事者乃疏狀

於御史驗與本狀不同卽日還以聞高祖大驚御史具

奏請不坐

鴻書

李汧公鎮鳳翔屬邑民因耨田得馬蹄金一瓮送於縣署

宰邑者慮公藏主守不嚴置於私室信宿重開視之皆
爲土塊以狀聞府遣吏案其事宰邑者莫能自白遂以
易金伏罪時袁相公滋在幕中疑此事沂公曰非判官
莫探情僞袁相曰諾因俾移獄府中按問乃令閱瓮間
得三十五塊詰其初獲者卽本質在焉遂於列肆索金
鎔瀉與塊形等旣成秤其半已三百斤矣詢其負擔人
力二農工昇至縣境計其負金大數非二人以竹擔可
舉明其卽路金已化土矣於是羣情大豁宰遂獲雪

劇談

錄

唐有內大臣學作別紙言語鳳翔節度使寄柴數車回書

謝云蒙惠也愚若干

盧氏雜說

陳希亮嘉祐中知鳳翔東坡初擢制科簽書判官事吏呼

蘓賢良公弼怒曰府判官何賢良也杖其吏

聞見後錄

蘓子瞻任鳳翔府簽書判官章子厚爲商州令二人同遊

南山抵仙遊潭下臨絕壁萬仞岸甚狹橫木架橋子厚

推子瞻過橋書壁子瞻不敢過子厚平步以過用索繫

樹躡之上下神色不動以漆墨濡筆大書石壁上曰章

厚蘓軾來遊子瞻拊其背曰子厚必能殺人子厚曰何

也子瞻曰能自拚命者能殺人子厚大笑

漫笑錄

隴西有辛道度者游學至雍城西見一宅有青衣女子在門道度詣門下求食女子入告俄出引道度入見一女曰我秦閔王女今日君來願爲夫婦經三宿女曰不可久居乃取金枕送出未逾數步惟有一塚道度至秦以枕貨於市適秦妃出遊見枕疑之道度具以實告妃悲泣遣人發塚啓柩始信之嘆曰此是我壻也遂封道度爲駙馬都尉賜金帛車馬令還本國

搜神記

太宗時李淳風奏北斗七星當化爲人明曰至西京市飲

酒帝使人候之有胡僧七人入自金光門至西京酒肆飲酒使者宣勅七人笑曰此必淳風小兒言也忽不見

國史
異纂

興元元年朱泚亂有閭敬立爲段秀實告密使潛出鳳翔夜抵太平舊館有二皂衫人控轡至廳皂衫人通曰知館官前鳳州河池縣尉劉俶敬立見之問曰此館甚荒蕪何也俶云館卒並散逃此皆某家奴權且應奉耳良久敬立與俶同食甚飽畜僕等皆如法敬立問俶別假一馬至四更俶又具饌令所借馬被馱而行東方似明

有吏迎拜曰前館無人大使何以宿及問所送僕馬俱
已不見所馱輜重已卻廻百步置路側館吏曰昔有河
池縣尉劉少府殯宮在彼館後久已頽毀敬立卻廻駿
之廢館牆後有古殯宮木馬廢堠冥器數人而已博異記

太和初沈亞之將之邠出長安城客橐泉邸舍春時晝夢
入秦主內史廖家內史廖舉亞之秦公召至殿前促前

席曰寡人欲強國願知其方先生何以教寡人亞之以

齊桓公對公悅遂試補中涓

秦官名

使佐西乞術伐河西

晉秦郊也

亞之帥將卒前攻下五城還報公大悅起勞曰大

夫良苦休矣居久之公幼女弄玉壻簫史先死公謂亞之曰微大夫晉五城非寡人有甚德大夫寡人有愛女而欲與大夫備灑掃可乎亞之少自立雅不欲遇幸臣畜之固辭不得請拜左庶長尚公主賜金二百斤民間猶謂簫家公主其日有黃衣中貴騎疾馬來延亞之入宮闕甚嚴呼公主出鬢髮著偏袖衣粧不多飾其芳姝明媚筆不可模畫侍女祇承分立左右者數百人召見亞之便館居亞之於宮題其門曰翠微宮宮人呼爲沈郎院雖備位下大夫繇公主故出入禁衛公主喜鳳簫

每吹簫必翠微宮高樓上聲調遠逸能悲人聞者莫不
自廢公主七月七日生亞之嘗無貺壽內史廖曾爲秦
以女樂遺西戎戎王與之水犀小合亞之從廖得以獻
公主主悅嘗愛重結裙帶上穆公遇亞之禮兼同列恩
賜相望於道復一年春公之始平公主無疾忽卒公追
傷不已將葬咸陽原公命亞之作挽歌應教而作曰泣
葬一枝紅生同死不同金鈿墜芳草香繡滿春風舊日
聞簫處高樓當月中梨花寒食夜深閉翠微宮進公公
讀詞畢之時宮中有出聲若不忍者公隨泣下又使亞

墓誌銘獨憶其銘曰白楊風哭兮石甃髣髴莎雜英
滿地兮春色煙和朱愁粉瘦兮不生綺羅深深埋玉兮
其恨如何亞之亦送葬咸陽宮中十四人殉亞之以悼
悵過戚被病猶在翠微宮然處殿外特室不居宮中矣
居月餘病良已公謂亞之曰本以小女將託久要不謂
不得周奉君子而先物故敝秦區區小國不足辱大夫
然寡人每見子卽不能不悲悼大夫盍適大國乎亞之
對曰臣無狀肺腑公室待罪左庶長不能從死公主幸
免罪戾使得歸骨父母國臣不忘君恩如日將去公追

酒高會聲秦聲舞秦舞舞者擊髀拊髀鳴鳴而音有不
快聲甚怨公執酒亞之前曰予顧此聲少善願沈郎賡
揚歌以塞別公命趣進筆硯亞之受命立爲歌辭曰擊
體舞恨滿煙光無處所淚如雨欲擬著辭不成語金鳳
銜紅舊綉衣幾度宮中同看舞人間春日正歡樂日暮
春風何處去歌卒授舞者雜其聲而和之四座皆泣旣
再拜辭去公復命至翠微宮與公主侍人別重入殿內
時見珠翠遺碎青階下牕紗檀點依然宮人泣對亞之
亞之感咽良久因題宮門詩曰君王多感放東歸從此

秦宮不復期春景自傷秦喪主落花如雨淚胭脂竟別
去公命車駕送出函谷關出關已送吏曰公命盡此且
去亞之與別語未卒忽驚覺卧邸舍明日亞之爲友人
崔九萬具道之九萬博陵人諳古謂余曰皇覽云秦穆
公葬雍橐泉祈年宮下非其神靈憑乎亞之更求得秦
時地志說如九萬言嗚呼弄玉旣仙矣惡又死乎

夢遊錄○

見郡守劉
組曾志畧

王維爲岐王畫一石有天然之致數年益精彩一旦風
雨中雷電交作屋宇俱壞不知所以後見軸空乃知畫

石飛去憲宗朝高麗遣使言幾年月日大風雨中飛一

奇石下有王維字印王不敢留遣使奉獻上命羣臣以

維手跡較之無毫髮差謬

西陽雜俎

許棲岩岐陽人曾舉進士習業昊天觀朝祝靈仙以希長
生一日市馬欲入蜀日加芻秣瘦削益甚卜之道流遇
乾之九五道流以爲龍馬云比登途歷險與馬俱墜棲
岩計窮乃去銜任其所之至一崖洞乘以入迥異塵界
見一道士卧石上二玉女侍焉曰太乙真君云乃詰棲
岩曰汝亦好道乎棲岩以老莊黃庭對問三經中得何

句答曰其精甚真息之以踵但卻以思壽無窮真君曰
近矣命坐酌小杯飲以石髓復邀入別室見潁陽尊師
棲岩熟視乃褰卜馬者也言今夕當東遊十萬里乃偕
從東海西龍山赴會復歸太白洞頃之思歸真君曰汝
飲石髓壽當千歲仍令乘馬以還曰此吾洞中龍以作
怒傷稼謫以負荷子有仙骨得值不然此太白洞天瑤
華上宮何由至乎至人間仍放之渭曲既別逡巡已達
虢縣無復故居矣問鄉人世代已六十年

太平廣記

唐貞元二年李晟復京師朱泚以千餘人西走昏忽迷路

問於田父曰豈非朱太尉耶源休止之曰漢皇帝田父
曰天不長凶地不生惡蛇不爲龍鼠不爲虎天網恢恢
去將安適泚怒將殺之忽失所在杜陽雜編

參軍黃仁濬自言壬子歲罷汧陽主簿至鳳翔城有文殊

寺寺中土偶數十軀忽自搖動狀如醉人食頃不止觀

者如堵

稽神錄

王祐岐州人常開館舍以待往來有一道士謁祐自稱

華山道士攜一張琴負一壺藥來求寄泊纔曙辭去祐

令人潛偵之見道士化一大鹿西走不知所之

蕭湘錄

唐昭宗初鳳翔釋甯師者忽暴終三口而蘓云冥中游歷
入一門見數殿各有榜一殿署云李克用於牖間窺有
一黑龍眇一日中立鐵柱連鎖繫之次一殿署云朱全
忠乃青髯白額虎鎖繫如初次署曰王建黃金牀上卧
一白兔次署曰李茂貞具冠冕如王者左右數侍女焉
次署曰楊行密牕牖卑暗不能細瞻問侍者曰此怪狀
者何耶曰將來王者也判官謂使者曰好送師回遂蘓
事聞於官皆以爲妄其後一皆符合初師爲冥司所攝
也一判官云和尚壽在而無祿召吏檢之只有乾荷葉

三石因令著於簿甯自此每斷厚食惟荷葉湯而已岐

下號入冥和尚

鴻書

元載寵姬薛瑤英母趙娟本岐王愛妾後出爲薛氏妻生
瑤英及載納爲姬善爲巧媚載惑之怠於庶務瑤英父
兄與趙娟出入賄賂號爲關節天下齎寶貨求大官職
無不指薛爲梯媒載死瑤英自爲俚妻矣

杜陽雜編○
以上見通志

東坡云少官鳳翔行山求邱見壁間有詩曰人間無漏仙
兀兀三杯醉世間無眼禪昏昏一覺睡雖然沒交涉其
奈畧相似相似尚如此何況真箇是故其海上濁醪有

妙理賦曰常因既醉之適方識此心之正然則此老言

人心之正與孟子言性善何以異哉 宋惠洪冷齋夜話

乾歸故城在縣西四十二里舊志以為乞伏乾歸所築未

詳舊志

五時原在縣南二十里 通志 雍縣有五時 漢書地理志○雍縣故城在縣南

杜陽山在縣東北二十五里杜水所出 雍勝略 故雍縣有杜

陽山北有杜陽谷有地穴北人不知所極在天柱山南

水經 鳳翔倚有杜陽山 金史地理志 其麓有老君坡 明一統志 唐

岐州刺史柴紹破突厥於杜陽谷即此 通志

靈山在縣西二十五里一名靈鷲山其西北有彭祖原通志

鄧水在城北十里合塔寺水入渭郡志水出鄧艾祠北故名

曰鄧公泉數源俱發逕雍縣城南東流注於雍水水經注

曲家河在縣北二十里源出縣北三十五里甯家溝其水

聲可驗陰晴通志

袁家河在縣西北二十五里築渠引流供人食用左家營

草灘營二村與水相近分水三分神羊廟地高井深遇

旱井涸無水可汲分水七分各開一渠引流以資食用

詳見神羊廟韋家堡碑記增補

橐泉在縣內東南隅其泉注水不盈旋盈旋涸有似無底

故名橐泉

舊志

雍縣有橐泉宮

漢書地理志

靈泉在城東北十里普門寺前

明一統志○按今普門寺前無靈泉又去城僅半里

許皆與所載不符或城東北十里別有普門寺姑存以備考

虎跑泉

一名金

在城東北十五里

名山記

在大像寺前一名

金沙泉

通志○據元胡居祐詩云普門祠下靈泉水則普門寺靈泉即今大像寺虎跑泉疑近是

玉泉有二一在城北三十里牛鉢峪其水流如玉後人就

此掘得隋開皇八年郡守強猛虎所造玉佛像一尊建

寺其上號玉泉寺禱雨輒應又號觀音湫見本寺碑文

一在城西三里有寶邑進士王麒詩

舊志

陳村鎮在縣西南三十里左右清流環抱林木茂美明張

雞山移居於此始立鎮又有雞山書院遺址僅存

舊志

簫史村在縣北五里以秦穆公壻簫史居故名一名簫史

宮其故宮久圯不可復識矣

增補

大像寺在縣東北十五里虎跑泉上古碑甚多而字跡模

糊

舊志

羅鉢寺在縣西南三十五里唐時建面山對水樹木叢茂

諸名流曾讀書其中

舊志

白蓮寺在縣西南七里唐開元時因白蓮生其地而建寺
明萬歷住持僧寶鑑戒行甚高每夜靜誦經聲聞數里
後遊京師神宗聞其名召見賜號妙峯禪師馳驛歸卒
於寺今塔像俱存

舊志

方山和尚四川崇慶人姓李氏因避難至隴州任氏養以
爲子名義十歲能文十三入隴庠後中崇正癸酉科鄉
試署河南祥符教諭後陞四川彭州刺史李賊陷京師
卽棄妻子削髮爲僧不知所往國朝順治十一年來
鳳翔住西鄉王甫村寺自號懶翁老人

舊志

王皮元時人居鳳翔城外八九里許盛暑入城買皮料歸憇道旁樹下有二卒來前狀貌奇怪問曰汝王皮與王疑懼遂以實對卒曰陰府攝汝王曰某生平無大過惡望賜矜憐卒不諾又曰容到家與妻子一別可乎卒乃諾將及門卒力挽之不能入王大叫比妻子來王已仆地氣絕矣然胸中微溫經宿未敢蓋棺王隨卒至一所儼若王者庭儀衛吏隸無不備問曰汝爲白起偏將坑趙降卒四十萬知其罪否王曰某傭工平生不曾讀書不知白起爲何人坑降卒爲何事於是令王起凡再

歷二庭亦如之乃反引至一大池邊取池中泥塗其胸
寒氣凜冽洞腹透背王卽陪曰某已記前身事矣復引
至原問第三殿王告曰某曾爲白起偏將殺降卒時某
曾力諫不從頃間引一荷鍬校者跪王側王識是白起
而形骸骨立蓋因久囚故也起見王曰子來矣予復何
言遂伏罪庭吏引王還第一殿檢錄陽壽未終卽命原
攝卒引至原憩樹下一推而蘓妻子親鄰且驚且喜扣
問備言其故有傳之京師者差進士尚哲篤來鳳翔覆
察果實時王元吉爲本府照磨知之尤詳且有抄錄公

文此事雖幻誕實可爲爲將而嗜殺人者之戒故節錄

大槩如上

元陶九成輟耕錄
以上俱見舊志

國朝康熙二十六年鳳翔府通判韓北城云奎樓築基將
半縣庠劉三異父棟梁議非其地事遂寢越兩月府縣
學博率紳士勸余余猶疑不肯決卜之帝君吉因董成
焉秋八月二十二日揭曉余連夜不能寐寐夢糧食滿
裝堂上左搬右運問何爲曰報新科舉子也及覺心內
有一識語紅旂赫赫顯神功後報劉三異程代中式海
虞源孫張子解曰裝者袋也程字有口口袋二字應在

程代長子韓民法曰凡糧必成倉成廩或成斗成升今
皆成袋明明程代字義也至於識語數日不能解一夕
民法侍曰漢高爲赤帝子紅旂非應姓劉者乎余恍然
大悟曰高祖姓劉名邦字季季者三也應劉三二字劉
三異學雖美而名未彰人或未推其中築樓時伊父曾
主別議神故祐之是異也劉三異三字顯然矣神之功
用大矣哉不祐其中式則此樓不傳祐其中式似以見
其所議之非且以見余舉行之有當也樓碑先成已立
樓上故附於是石

奎星顯應記。今文昌祠
東廊房簷壁石刻現存

